

PEMBERITAHUAN PERTANYAAN

DEWAN RAKYAT, MALAYSIA

PERTANYAAN : LISAN
DARIPADA : YB. PUAN MAS ERMIEYATI BINTI
SAMSUDIN
KAWASAN : MASJID TANAH
TARIKH : 26.11.2014 (RABU)
NO. SOALAN : 42

YB. PUAN MAS ERMIEYATI BINTI SAMSUDIN minta MENTERI PERDAGANGAN ANTARABANGSA DAN INDUSTRI menyatakan sejauh manakah Kerajaan telah melaksanakan program *outreach* bagi menerangkan kepada segenap lapisan masyarakat terhadap penglibatan Malaysia dalam Perjanjian Perkongsian Trans-Pasifik (TPPA) dan apakah manfaat yang boleh dibawa oleh perjanjian ini, khususnya dari segi akses pasaran yang boleh dijangkakan.

JAWAPAN

Tuan Yang Dipertua,

MITI telah mengadakan konsultasi dengan pelbagai pihak seperti wakil-wakil Kerajaan Negeri, badan-badan bukan kerajaan, wakil industri, ahli akademik, persatuan-persatuan perniagaan, golongan pelajar-pelajar dan institusi pengajian tinggi serta lain-lain kumpulan untuk memberi penerangan mengenai perkembangan rundingan serta isu-isu di bawah TPP. Pada tahun 2013 sahaja, MITI telah mengadakan sebanyak 56 sesi *engagement* seperti hari terbuka di mana ianya telah dihadiri oleh seramai 1,500 orang, konsultasi, forum dan dialog untuk menerangkan perkembangan rundingan di samping mendapatkan pandangan rakyat.

Pada tahun 2014, sehingga bulan Oktober, sebanyak 33 sesi engagement ataupun konsultasi telah dilaksanakan. Selain itu, pasukan perunding juga mengadakan konsultasi khusus mengenai isu-isu yang dirundingkan dengan stakeholders yang berkenaan. Sesi konsultasi akan terus dipertingkatkan dengan pelbagai kumpulan berkepentingan untuk menerangkan perkembangan rundingan serta memperjelaskan kemusykilan yang mungkin wujud.

Selain itu, Kerajaan pada Jun 2013 juga telah menubuhkan TPP Caucus Dewan Rakyat secara bipartisan yang telah banyak menyumbangkan input dan pandangan yang amat berguna kepada pasukan perunding Malaysia. Di samping TPP Caucus Dewan Rakyat, Kerajaan juga telah menubuhkan TPP Caucus Dewan Negara dimana perjumpaan pertama dan perjumpaan kedua masing-masing telah diadakan pada 15 Mei 2014 dan 9 Oktober yang lalu. TPP Caucus Dewan Negara dan Dewan rakyat telah banyak membantu Kerajaan terutamanya dalam menasihati Kerajaan dalam rundingan. Kerajaan merakamkan ribuan terima kasih ke atas maklum balas semua Ahli TPP Caucus yang terlibat.

Tuan Yang Dipertua,

Perjanjian Trans-Pacific Partnership adalah satu saluran bagi meningkatkan perdagangan antarabangsa yang merupakan enjin pertumbuhan ekonomi yang penting kepada negara. Malaysia merupakan antara negara yang menerima manfaat daripada proses liberalisasi dan fasilitasi melalui perjanjian perdagangan antaraabangsa dan keuntungan yang diperolehi antara lain, adalah:

- i) akses pasaran bagi pengeksport dan pembekal perkhidmatan Malaysia dipertingkatkan melalui layanan keutamaan (preferential treatment);
- ii) menyediakan sumber input dan bahan mentah bagi industri tempatan pada kos yang lebih murah dengan pengurangan atau pelupusan duti import;
- iii) memperkukuhkan kedudukan Malaysia sebagai destinasi untuk pelaburan asing (foreign direct investments – FDI);
- iv) mempromosi bina upaya melalui kerjasama ekonomi dan teknikal; dan
- v) meningkat keupayaan dan daya saing industri Malaysia melalui persaingan yang lebih kompetitif.

Malaysia sebagai negara yang mempunyai sistem ekonomi yang terbuka amat bergantung kepada perdagangan antarabangsa. Oleh yang demikian, adalah penting untuk Malaysia menyertai rundingan TPP supaya kita tidak ketinggalan dalam meraih faedah daripada pembukaan pasaran yang mempunyai 800 juta penduduk ini.